

PETRUQ Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaû dik é lumjínq hkyô lé hap yù bê bâng chyáng dang kyô kat lhê.

² Garai Gasang eq nga-nhông é Yhumsíng Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

*Ji Yu É Eq Hkyin Yu É Hkyô Lé Lhoq Ging Lhoq
Tíng Râ Hkyô*

³ Yhâng é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasâng é hpungwup a-tsam gi, asak duì hkyô eq tarâ hkungga hkyo é matú nga-nhông râ é jung hkangmó lé byi bê nghut ri. ⁴ Haú pé dông mai, Yhang gi, Yhâng é kô dik, hpaû dik é danggidiq pé nga-nhông lé byi bê nghut ri; haú hkûn, nungmoq gi, haú danggidiq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

⁵ Hau é yanmai yhang, nungmoq gyai yhang shikut luí, nungmoq é lumjínq hkyô má ge é hkyô

lé jat yù keq; ge é hkyô má sumsé hpaqchyî lé, ⁶ sumsé hpaqchyî má yhumsing gùng yhumsîng hkang é hkyô lé, yhumsing gùng yhumsîng hkang é hkyô má jân shirang é hkyô lé, jân shirang é hkyô má tarâ hkunggâ é hkyô lé, ⁷ tarâ hkunggâ é hkyô má gumang chyitkâng myit lé, gumang chyitkâng myit má chyitdap myit lé, jat yù keq. ⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhûng é Yhumsîng Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng râ a nghut. ⁹ Nghut kôhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luî, lai lò bê yhâng é yubak mara pé mai lhoq sanséng byî é hui bê hkyô lé, tô-myhî pyám bê sù nghut ri.

¹⁰ Haû mù luî, ngá é gumang wui ê, nungmoq lé ji yu é hkyô eq hkyin yu é hkyô lé, je riyhang lhoq gingtîng nyî keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut; ¹¹ hau htoq agó, nga-nhûng é Yhumsîng eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

Chyúmdang Mâ É Myiqhtoi Dang

¹² Haû mù luî, nungmoq gi, hau pé lé sé kô é htoq agó, nungmoq wó tô é tengmán hkyô má gingtîng nyî kô é nghut kôhang, ngò, nungmoq lé hkâ-nhám le hau pé lé ru lhoq pûn nyî râ nghut lhê. ¹³ Shî gungdu má ngò rû ðui nyî nyî gi, nungmoq lé lhoq pûn kying byî le ge ri nghû, ngò wó myit ri; ¹⁴ haî

mù gâ le, nga-nhông é Yhumsîng Yesuq Hkrisduq gi, ngo lé san za sé nhâng bê eq rajung za, hkâ-myhâng a myáng má, ngò gi, gungdu shi lé tô pyâm to râ nghut é lé sê lhê. ¹⁵ Ngò htoq ló byuq é htâng má, nungmoq, hkâ-nhám le haú pé lé ru wó bûn nyi râ lé myàng nau mù, ngò, wó dut é í shikut nyi râ nghut lhê.

¹⁶ Nga-nhông é Yhumsîng Yesuq Hkrisduq é a-tsam eq lé lo é hkyô eq séng luî, nungmoq lé ngamoq taî kyô wú é hkûn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê. ¹⁷ Hkâsu mù gâ le, haú Kô Làm Hkikhkâm Hkyo é Hpungwup Shing kang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."☆ ga taî é htê, Yhâng chyáng jé é hkûn, haú Îwa Garai Gasâng chyáng mâ é aróng eq hpungwup shing kang lé Yhang wó hap yù bê nghut ri. ¹⁸ Ngamoq yhang, chyoiyúng bùm má Yhang eq rahá nyi tô é hkûn, htê haú mauhkûng mai htoq lo é lé wó gyô é nghut lhê.

¹⁹ Haú mù luî, myiqhtoî pé dang lé je lhoq ging bê hkyô, ngamoq wó é nghut lhê; haú mù, maubó lô luî, nungmoq é myit má bó-myhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoî dang haú lé, nungmoq gyo mù rago châng kut râ dut lhê. ²⁰ Banshoq htoq má, Chyúmdang mâ é myiqhtoî dang gi, haú myiqhtoî pé mai ó le ó lichyúm lhoq htoq yu é dông a nghut é lé, nungmoq sê to râ dut lhê. ²¹ Hkâsu mù gâ le, myiqhtoî dang gi, byù ô nau é dông hkâ-nhám

☆ **1:17** Mht 17:5; Mrk 9:7; Luk 9:35

lé a htoq wú é za, haú Chyoiyúng Woi-nyí èq shuí u huí é bang mai, Garai Gasâng chyáng mâ é dang taí é ru nghut lhê.

2

Sará Apyoq Pê É Hkyô

¹ Nghut kôlhang, myiqhtoi pyoq pé gi, Israelaq byù haú bâng é ahkaû má nyi wú bê nghut lhê, haú eq rajung za, nungmoq é ahkaû má le sará apyoq pé nyi rá za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wuì yu é, Yhumsîng lé lhang he-ngik pyám kó râ nghut lhê. Haú mù, yhangmoq gi, yhumsing gùng yhumsîng byòdàn tung htên byoq hkyô jé nhâng bekô râ nghut lhê. ² Byù myo myo gi, haú bâng é ahoq ahî hkyô má cháng kó râ eq, tengmán hkyô lé taí hpoí pyám nhâng kó râ nghut lhê. ³ Sará apyoq haú bang gi, yhangmoq myoqnoq é hkyô má, yhangmoq kut htoq tô é mhô-myi dông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhî tô nyi é a nghut.

⁴ Hkâsu mù gâ le, Garai Gasang gi, mara kut shut é maumâng pé lé lhang a ha bûn é za, ngaraî ming má hkyô pyám luî, tarâ jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê. ⁵ Yhang gi, tarâ a hkunggâ é byu pé lé dowuî tîng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotû nyhit yuq lé hung yu é

nghut ri; ⁶ Yhang gi, Sodom eq Gomoraq myuq lé, myi-mhop dut shoq nyhê hkyô pyâm é dông mara dam byi luî, tarâ a hkungga bâng chyáng dut lò râ hkyô é azòng kut tô é nghut ri; ⁷ nghut kôlhang, tarâ a chûng bâng é achâq achyut asak duì hkyo é yanmai myit wui myit hke huî é, haû dingmán sù Lot lé hkyi htoq yu é nghut ri; ⁸ (hkâsu mù gâ le, dingmán sù haû gi, nyî hkangmó yhangmoq ahkaû má nyi nyi é nghut luî, tarâ a chûng é muzó hkyô lé, yhang wó myâng wó gyô é yanmai, yhâng é dingmán myit má gunjâng é hui sù nghut ri.) ⁹ Haû su nghut é nghut jáng, Yhumsîng gi, tarâ hkunggâ é byu pé lé, wuîhke hkyô mai hkâsu kut hkyi htoq yû râ eq, a dingmán é bang lé, tarâ jéyáng é buinyî jé shoq, dam byî é hkyô lé xoq kut nyi é u má hkâsu kut zuî zing to râ lé sê lhê. ¹⁰ Haû yubak gungshô é htên byoq sê é yut yut ô naû hkyô châng é eq ahko ahkáng lé wú tiq bâng chyáng, haû hkyô hkyak dut râ nghut lhê.

Byù haû bang gi, ngegáng-htu é eq nghutbûn é bang nghut kôluî, mauhkûng bang lé lumù gansâng râ lé a gyuq kó nghut ri; ¹¹ nghut kôlhang, maumang lagyô pé lháng gi, wum je bo é eq a-tsam je bo é nghut kôle, haû Yhumsîng é hí má, haû mauhkûng bang lé mara hun é dông lumù gansâng hkyô a wám kut kó nghut ri. ¹² Nghut kôlhang, haû sará apyoq pé gi, yhumsîng a sê gyô é hkyô pé lé rhoî dang tái akô. Yhangmoq gi, haû chyup yu é hui luî, lhoq htên pyâm é hui râ matú za hku lé lo é, nhik a bo é tân jung dusak dông nghut akô; dusak haû pé su, yhangmoq le, htên byoq byuq kó râ nghut lhê.

13 Yhangmoq gi, nò shoq kut bekô nghut é yan-mai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lháng gungsho yut yut ô naù hkyô lhoq dik râ matú nghut ri. Yhangmoq gi, nungmoq eq rahá zoshuq poi kut kô é hkûn, mhaù é lé yhangmoq é ngón hkyô kut kômù, agè agaú é eq achaq achyut é bang nghut akô. 14 Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtíng é bang lé mhoq hpyoq yu akô; yhangmoq gi, myoqnoq é hkyô má kûng é bang nghut kômù, nhíng pyâm é hui bang nghut akô. 15 Yhangmoq gi, haù dítg é hkyô lé tô pyâm to kômù, Beora é yhangzo nghut é, agè ashop hkyo é ahpau lé chyitdap sù Balam é hkyô má châng yông wún bekô nghut ri. 16 Nghut kôlhang, Balam gi, yhang kut shut é hkyo é yanmai, logúng eq tân mhoqshít é hui ri; dang a dat nyo é logúng haù gi, byu é htê dông dang taì lò mù, myiqhtoi hpó a gyíng é hkyô lé hkûm tang pyâm ri.

17 Byù hau bang gi, wuì a bo é wuìhtung eq, laidûn eq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaù lé lajang to bê nghut ri. 18 Hkâsu mù gâ le, yhangmoq gi, asôm gyáng dang lé taì mù, yubak gungshô é yut yut ô nau é hkyô dông mai, haù shut shai é hkyô má asak dui nyí é mai asik za hpanq htoq lo é bang lé, mhoq hpyoq yù akô nghut ri. 19 Yhangmoq gi, haù bang lé luthkyô byi râ gidíq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô naù hkyo é jùn

dut nyi akô; hai mù gâ le, byù rayuq gi, yhumsîng lé hai èq up sing le, hai é jùn nghut lhê. ²⁰ Byu pé gi, nga-nhûng é Yhumsîng eq hkyi yù Sû nghut é Yesuq Hkrisduq lé sê é đông mai, mingkân é agè ashop hkyô mai wó hpanq lut htoq bê nghut kôle, yhangmoq lé hau èq tuî yup tô é dum hui luî, ung pyâm é hui kô é nghut jâng, yhangmoq é matú, hí lhê htoq má je wuî byuq kó râ nghut lhê. ²¹ Haù dîngmán é hkyô lé yhangmoq sé luî, yhangmoq lé ap byî to bê nghut é chyoiyúng hkunmó lé tô pyâm to mù lhing taù ló byuq kô é htoq má, haù hkyô lé a sê é gi, yhangmoq é matú je gè kó râ nghut lhê. ²² "Hkui gi, yhang hpat tô é lé dum taù zô lhê." gâ é eq, "Waq gi, chî pyám byî é htâng, yhâng é galhu htum má dum taù lûu lhê." ✧ gâ é sanghkyang gi, yhangmoq chyáng dik bê nghut ri.

3

Haù Yhumsîng Jé Lé Râ Buinyì

¹ Chyitdap é luzúm wuî ê, shî gi, nungmoq lé ngò í dá nghû râ dàm ká byî kat é laiká nghut lhê. Laiká shî í lhum má, nungmoq é sansêng é i-myt lé lhoq toq râ matú taì pùn kat é laiká nghut lhê. ² Haù gi, chyoiyúng myiqhtoì pé mai lai lò bê hkùn taì tô é dang pé eq, nga-nhûng é Yhumsîng eq hkyi yù Sû mai, nungmoq é lagyô pé đông byî to bê nghut é hkunmó lé, ngò, nungmoq lé bun nhâng naù luî nghut lhê.

³ Sâng-hi má, ló htâng é buinyì pé má yhumsing é agè ashop ô naù hkyô má cháng luî taì hpoi bang htoq lô râ nghut é lé, nungmoq sé gyô to ra

✧ 2:22 Sânghkyang 26:11

râ nghut lhê. ⁴ Haú bang gi, "'Dum jé lé râ' ga Yhang gidiq byí é gi, hkâmá lhú? Nga-nhông é îchýí îwâ pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga tái kó râ nghut lhê. ⁵ Nghut kôlhâng, yhangmoq gi, a-nham lé, Garai Gasâng é hkunmó mai, mauhkông pé joq é eq, myigùng gi, wuì mai dut htoq nhâng mù, wuì dông hpan tó é hkyô lé, a sé gùn kut pyâm akô nghut ri. ⁶ Wuì hau èq sheq, haú hkun lhê é mingkan lé dowuì tít mù, lhoq htên pyâm é nghut lhê. ⁷ Ahkui lhê é mauhkông pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyi jé shoq, myi má nyhé râ matú, hkunmó hau èq Yhang hkong to bê nghut ri.

⁸ Nghut kôlhâng, chyitdap é luzúm wuì ê, haú Yhumsing é hí má, ra-nyí gi, zanwut rahkyîng dông, zanwut rahkyîng gi, ra-nyí dông nghut é hkyô shí lé, hkâtô-myhí kó. ⁹ Haú Yhumsing gi, Yhâng é danggidiq lé hân a lhoq dik ga byù ram myit ngam pyâm é su, nyhâm é Sú a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhîng râ lé za ô nau mù, nungmoq lé myit hîng byí nyi é nghut lhê.

¹⁰ Nghut kôlhâng, haú Yhumsing é buinyi gi, hkau sù su a bûn nùng má jé râ nghut lhê. Haú buinyi má, mauhkông pé gi, mying hum htê eq byuq byuq râ nghut lhê; duqbó-gûng pé gi, myi èq lhoq htên pyâm é hui luí, myigùng eq haú mâ é joq mijoq gi, nyé gyó byuq râ nghut lhê.

¹¹⁻¹² Joq mijoq gi, haú hkyô dông lhoq htên pyâm é hui râ nghut é yanmai, nungmoq gi, hkasû é byu

pé dut ra râ lúh? Nungmoq gi, haú Garai Gasâng é buinyì lé ho nyi é eq buinyì haú hân za jé râ lê ô nau nyi é hkûn, chyoyúng é eq tarâ hkunggâ é asak duì hkyô dông nyi ra râ nghut lhê. Buinyì haú gi, mauhkûng pé lé, myî eq lhoq htên pyám luî, duqbó-gûng pé le, lûm nyé luî, nyé yui pyâm é buinyì dut râ nghut lhê. ¹³ Nghut kôlhang, nga-nhúng gi, Garaí é danggidiq nghut é, dingmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

¹⁴ Haú nghut mù luî, chyitdap é luzúm wuî ê, nungmoq gi, haú hkyô lé myoqbyu é bang nghut kô é yanmai, Yhang é hí má achag achyut a dut é eq mara hûn râ hkyô a bo é za, Yhang eq nguingón nyi râ hkyô lé gyai yhang shikut nyi keq. ¹⁵ Nga-nhúng é chyitdap gumang Poluq gi, yhang lé, Garaí Gasang byî tô é hpaqchyî byéng-yá èq, nungmoq chyáng ká byi bê eq rajung za, nga-nhúng é Yhum-sing é myit hîng hkyô gi, hkyi yù hkyô nghut é lé matsîng to keq. ¹⁶ Poluq gi, yhang kâ é laiká pé banshoq má, haú hkyô pé eq séng luî rajung za kâ shit tô ri. Yhang é laiká hkaú pé má, ra-am gi, sê gyo wuî é hkyô pé bo é yanmai, a mhoq wú é bang eq a gingtîng é bang gi, gotû Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsîng htên byoq hkyô kut yu nyi akô nghut ri.

¹⁷ Haú mù luî, chyitdap é luzúm wuî ê, nungmoq gi, shí hkyô lé sê to gù nghut é yanmai, tarâ a chûng bâng é shut shaí hkyo èq nungmoq lé a wó shuí nghoq yû râ eq, nungmoq é gaú é jowò mai a wó byit gyó byuq sháng gaq, yhumsing gùng yhumsîng

upzúng nyî keq. ¹⁸Nga-nhûng é Yhumsîng eq hkyi yù Sû nghut é Yesuq Hkrisduq é jeju eq hpaqchyî hkyô má, nungmoq kô myhang lò kó sháng gaq. Hpungwup shingkang gi, Yesuq Hkrisduq chyáng, ahkuî le, ahtum abyuq le, ru joq nyî sháng gaq ô! Amen.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee